

Aningaasaqarnikkut ingerlatsineq pillugu nalunaarut 2026

(Aningaasaqarnermut Naalakkersuisoq)

Saqqummiussissut

Matumuuna Aningaasaqarnikkut ingerlatsineq pillugu nalunaarut 2026 Naalakkersuisut saqqummiuppaat.

Aningaasaqarnikkut ingerlatsineq pillugu nalunaarut aningaasaqarnikkut pissutsinik politikikkullu aningaasaqarnikkut qitiusumik ilungersunartunik, nunatta ukiuni aggersuni aqqusaagasaanik ataatsimut takutitsisuuvoq. Peqatigisaanik nalunaarut aningaasaqarnikkut politikimut patajaatsumut, aqqissuusseqqinnernut pisariaqartunut 2027-mullu aningaasanut inatsimmik suliaqarnermut toqqammaviussaaq.

Aallaavik nukittuvoq. Aningaasaqarnikkut ingerlatsineq qaffasippoq. Suliffeqartut appariartulaarput, sulili qaffasissumiillutik. Namminersorlutik inuussutissarsiortuni pisortallu ingerlatsivianni sulisussanik pisariaqartitsineq annertuvoq. Ineriartornerli pitsaasoq nunarput tamakkerlugu assigiimmik agguarsimanngilaq, aallaaviullu nukittunera uninngaannalernermik kinguneqassanngilaq.

Akerlianik aqqissussaanikkut ilungersunartunut, atugarissaarnermut, inuussutissarsiornikkut ineriartornermut pisortallu aningaasaqarnerannut tunngasunik piffissaq eqqorlugu aalajangiinernut tamanna atorneqassaaq.

Nalunaarummi pissutsit tallimat Inatsisartut suliarinninneranni politikikkullu suleriaqqininnermi annertuumik pingaartinneqartariaqartut allaaserineqarput.

- Siullertut innuttaasut ukiumikkut katitigaanerisa ineriartornerat piffissaagallartillugu passunneqassaaq, taamaalilluni soraarnerussutisiaqartitsinermik aqqissuusseqqinnernut pisortallu aningaasaqarnerat aningaasarsiornikkut patajaatsooqqullugu.
- Aappassaattut sulisinnaasut ilinniartitaaneq, piginnaanngorsaaneq, nuttarsinnaassuseq sulisartunillu avataaneersunik akisussaassuseqartumik atuinikkut nukittorsarneqassaaq.
- Pingajuattut pisortat aningaasartuutaat, sanaartukkanik suliniutit angisuut akiitsornerillu ataatsimoortillugit ungasissumullu sammisumik aqunneqassapput.
- Sisamassaattut inuussutissarsiornermut toqqammaviit annertusitinneqassapput, taamaalilluni aningaasarsiorneq inuussutissarsiutini isertitanilu ataasiakkaani nikeriarnernit eqqorneqarsinnaassusia annikinnerulersinniarlugu.

- Tallimassaattut aaqqissuusseqqinnerit, immikkoortunut pilersaarutit aningaasanullu inatsimmi pingaarnersiukkat imminnut qaninnermik ataqatigiissillugit isigineqassapput.

Naalackersuisut soraarnerussutisiaqarnermut nutaamut ataqatigiittumut, isumaginninnikkut oqimaaqatigiittumillu aningaasaqarnikkut illersorneqarsinnaasumut ataatsimut kaammattuutinik piareersaapput. Pineqartumut sulisinneqartut immikkut ilisimasallit kaammattuutiminik januaari 2027-mi tunniussinissani qinnutigineqarput. Taamaalilluni ungasissumut isigaluni aningaasaqarnermik patajaatsumik qularnaariniarnermik suliaqarnermi soraarnerussutisiaqarnermik immikkoortoq sulinerup ilaatut suli pingaartinneqartariaqarpoq. Taamaammallu manna immikkoortumi ataqatigiittumik aningaasaqarnikkullu akisussaassusilimmik taamaallaat aalajangiisarnissaq pingaaruteqarluinnarpoq.

Suliffissaqanngitsut ikittuugaangata, suliffeqarfiillu amerlasuut sulisussanik amigaateqaraangata, sulisussanik piukkunnartunik amigaateqarneq ineriartornermut tigussaasumik killiliisunngortarpoq. Tamanna namminersorlutik inuussutissarsiortuni, kommunini Namminersorlutillu Oqartussani atuuppoq.

Taamaammatt suliniarneq ataatsikkut siunnerfinnut arlalinnut agguarlugu ingerlanneqassaaq: ilinniartitaanerit pitsaannerusut, nukittunerusumik suliffeqaannartitsineq, suliffeqarnermut ikaarsaarnert pitsaannerusut, nuttarsinnaaneruneq, naammassinnissinnaassuserlu qaffasinnerusoq. Piffinni sulisinnaasut naammakkunnaaraangata, sulisinnaasunik avataaneersunik atuineq erseqqissumik akisussaassusilimmillu malittarisassaqaartinneqassaaq.

Nunatta aningaasaqarnera inuussutissarsiornermik ingerlatseqatigiinni ataasiakkaani isertitanilu nikeriarnerni suli qajannartumiippoq. Aalisarneq suli namminersortuni inuussutissarsiutit pingaarnersaraat, suliffeqarnermullu, avammut niuernermet pisortallu isertitaannut pingaarutilimmik sunniuteqarpoq. Tamatuma isumalluutinik akisussaassusilimmik aqutsinissamik siammassinnerusumillu inuussutissarsiornermi ineriartortitsinermik pisariaqartitsineq erseqqissarpaa.

Takornariartitsineq, nukissiutit, aatsitassat, digitalinngorsaaneq piffimmilu nalilinnik pilersitseriaasit nutaat, aningaasaqarnermut nukittunerusumut ilapittuissapput. Periarfissalli aatsaat sinaakkutitut atugassarititaasut aalaakkaasuuneranni piviusunngortinneqarsinnaapput. Pingaarnersiunerit ersarissuunerat, aningaasaliinerillu, immikkoortunut pilersaarutit aningaasaqarnikkullu politikip ataqatigiinnera tamatuma kinguneraa. Tamanna Naalackersuisuni Inatsisartunilu aalajangernissanut piumasaqaateqarfiuvoq.

Naalackersuisut Attassiinnarnissamut Ineriartortitsinissamullu Pilersaarut 2-mi aningaasaqarnikkut ineriartornermut patajaannerulersitsinissamik sulinissamut ungasissumik sammisunik sinaakkusiipput. Aaqqissut tamarmik ataatsikkut inissaannik pilersaarut tunngassuteqanngilaq. Aaqqissuusseqqinnerit suliniutillu annertunerit sukumiisumik pilersaarusiorneqarlutillu ataqatigiittumik pingaarnersiornissaannik taanna siunnerfiliivoq.

Taamaammatt siunissami aalajangernissat aningaasaqarnikkut patajaassutsimut, naammassinnissinnaassutsimut, sulisussaatinik atugarissaarnermullu sunniutaatigut

nalilersorneqartassapput, taamaalillunilu piffissami sivikitsumi sunniutiinnaat pineqassanatik. Ilinniartitaanermi, ineqarnermut immikkoortumi, akileraarutitut akitsuutinullu immikkoortumi, takornariartitsinermi, nukissiuteqarnermi, digitalinngorsaanermi pisortallu ingerlatsiviata aqqissugaanerani sulineq ataqatigiissinneqassaaq. Immikkoortullu taakku ataqatigiiffiini aqqiissutit ataavartut nassaarineqassapput.

Digitalinngorsaaneq, paasissutissanik atuilluarneq, silassorissuusiat teknologiillu nutaat allat suliassat pisarinnerusumik naammassinissaannut, sullissinerit pitsanngorsarnerannut ilapittuillutillu suliassanik pingaarnernik isumaginninnissamut piffissaqartitsinerussapput. Teknologili akisussaasumik, qularnaatsumik nunatsinnilu pissutsinik ataqinnittumik atorneqassaaq. Inunnik sulianillu isumaginninnermi pitsaassutsimik ikorfartuissaaq, aqqissussaaneermilu ilungersunartut aqqinneqarnissaani kisimiilluni sakkutut atorneqarnani.

Ukiuni aggersuni pisortat aningaasaqarnerat eqqummaarinnerulluni aqunneqassaaq. Ingerlatat amerlasuut annertuunillu aningaasaliinerit siuariartitsisinnaapput, taakkuli aamma akinik, akiitsunik suliffeqarnermillu ilungersortitsinermik pilersitsisinnaapput. Taamaammat sanaartugassat annertuut, immikkoortunut pilersaarutit, ingerlatsinermi aningaasartuutit nutaat aningaasaliinerillu aalajangiisoqartinnagu ataatsimut nalilersorneqassapput.

Ilaatigut EU-mik naalagaaffimmillu suleqatigiinnermik isumaqatigiissutit ataatsimoortumik isumaliutiniitinneqassapput. Isumaqatigiissutit, pilersaarutit aningaasaliisinnaassutsillu taamaattut nutaanik periarfissiisinnaapput, taakkuli aamma nunap nammineq anguniagaanut, piginnaasaanut aningaasaqarnikkullu sinaakkutaanut ilanngullugit pingaarnersiorneqassapput. Tamanna ataatsimoortumik ungasissumullu sammisumik erseqqissumik pilersaarusiornissamik pingaarnersiuinissamillu pisariaqartitsinermut annertusaavoq.

Tassungalugu atatillugu aningaasaqarnermik aqutsinerup nukittorsarnissaanik suliaq Naalakkersuisut nangissavaat, politikikkullu anguniakkat, immikkoortuni pilersaarutit aningaasaqarnikkullu sinaakkutit qaninnermik ataqatigiissinnissaat qulakkeerlugu.

Ullumikkut aalajangiinerit aningaasaliiffigineqassappata, atuutilersinneqarlutik kingornalu ingerlatsinermi atuussinnaassappata, tamanna pisariaqarpoq.

Taamaalilluni aningaasaqarnikkut ingerlatsineq pillugu nalunaarut 2026 pitsaassutsinik ajoqutinillu takutitsivoq. Nunatta aallaavigippoq, pingaarutilinnilli aalajangiisariaqarpugut. Piffissaagallartillugu iliuuseqarutta, akisussaassusilimmik pingaarnersiulluta ungasissumullu isiginninnitsinnik attassigutta, inuiaqatigiinnik nukittunerusunik aningaasaqarnermillu attanneqarsinnaanerusunik pilersitsinissamut periarfissagissaarpugut.

Taamaammat nalunaarusiaq Naalakkersuisut 2027-mut aningaasanut inatsimmik suliaqarnerannut qanimut ataqatigiissillugu isigineqassaaq.

Inatsisartut aningaasaqarnikkut ingerlatsineq pillugu nalunaarut 2026-mik tigusilluarnissaat neriuutigaara, inersuarmilu maani oqallinnissaq qilanaaraara.

Taama oqaaseqarlunga nalunaarut inatsisartunut suliassanngortippara.